



JAMHURI YA MUUNGANO WA TANZANIA

WIZARA YA MAWASILIANO NA
TEKNOLOJIA YA HABARI

Jarida La Mawasiliano

Toleo la nne, 2021



TEHAMANA KWA
MAENDELEO YA
TAIFA LETU

DKT. CHAULA AANZA UTEKELEZAJI MABORESHO YA MIFUMO YA TEHAMA



Katibu Mkuu wa Wizara ya Mawasiliano na Teknolojia ya Habari, Dkt. Zainab Chaula akiongoza kikao cha wadau wataalamu wa TEHAMA kujadili maboresho ya mifumo ya TEHAMA. Kushoto ni Mkurugenzi wa TEHAMA wa Wizara hiyo Mulembwa Munaku

Na Faraja Mpina WMTH, Dodoma

Katibu Mkuu wa Wizara ya Mawasiliano na Teknolojia ya Habari, Dkt. Zainabu Chaula leo amefungua kikao cha wadau wataalamu wa TEHAMA kutoka katika Wizara na taasisi za Serikali ili kujadili na kufanya tathmini ya mifumo ya TEHAMA inayotumika nchini ili kupata idadi, aina ya mi-

fumo hiyo, taarifa zinazohusu mifumo hiyo na inapohifadhiwa.

Kikao hicho kimefanyika katika ukumbi wa mikutano wa Wizara hiyo jijini Dodoma ikiwa ni utekelezaji wa maelekezo yaliyotolewa na Waziri wa Wizara hiyo,

Dkt. Faustine Ndugulile ya kuitisha kikao hicho ili wataalamu wa TEHAMA waifanyie tathmini mifumo hiyo hasa ya kifedha ili iweze kusomana na kubadilishana taarifa. utaratibu.

“Ninyi ndio wataalamu wa mifumo hivyo naamini kikao hiki kitakuwa na matokeo kwa kutafuta majibu sahihi ya maeneo yote aliyoelekeza Waziri mwenye dhamana kuhusu hii mifumo ya TEHAMA, Serikali ipo macho inaangalia na inamjua kila mtumishi na utendaji wake hivyo tusaidiane tufanye kazi kwa wema, kwa kuwa wapenda haki; wakweli na wenyewe uchungu na nchi yetu”, alizungumza Dkt. Chaula.

Aliongeza kuwa taarifa zote za Wizara na taasisi za Serikali zinatakiwa kuhifadhiwa katika Kituo cha Taifa cha kuhifadhi Data (NIDC) ndio sababu ya kuundwa kwake na ndio maelekezo yaliyotolewa na Ofisi ya Rais – Ikulu hivyo kikao chenu kichambue na kutoa taarifa sahihi ya taasisi ngapi taarifa zao zipo NIDC na zipo hazipo na kwa sababu gani.

Aidha, Dkt. Chaula amewataka wataalamu hao pamoja na kuainisha mapendelekezo ya kuboresha mifumo hiyo wanatakiwa kutengeza utaratibu utakaozingatiwa kuhusu mifumo ya TEHAMA, kwasababu ikitumika vibaya na kuharibu mambo ni uhalifu kwasababu itakuwa imeenda kinyume na

Naye, Mkurugenzi wa TEHAMA wa Wizara hiyo Mulembwa Munaku amesema kuwa wajumbe wa kikao hicho ni wataalamu wa TEHAMA kutoka katika taasisi na Wizara zinazohusika na mifumo ya TEHAMA nchini na kwa pamoja wamepokea maelekezo ya Dkt. Chaula na kuyafanya kwa mujibu wa maelekezo ya Waziri wa Wizara hiyo kuhusu mifumo ya TEHAMA na kuwasilisha taarifa yao ndani ya muda uliopangwa.

Wataalamu hao wa TEHAMA walikutana kwenye kikao hicho ni kutoka Wizara ya Mawasiliano na Teknolojia ya Habari; Ofisi ya Rais – TAMISEMI; Ofisi ya Rais, Menejimenti ya Uutmishi wa Umma na Utawala; Wizara ya Fedha na Mpango; Ofisi ya Mdhibiti na Mkaruzi Mkuu wa Hesabu za Serikali; Mamlaka ya Mawasiliano Tanzania; Shirika la Mawasiliano Tanzania; Kituo cha Kuhifadhi Data cha Taifa; Mamlaka ya Mapato Tanzania; na Mamlaka ya Serikali Mtandao.



Baadhi ya wajumbe wa kikao cha wadau wataalamu wa TEHAMA cha kujadili maboresho ya mifumo ya TEHAMA nchini wakimsikiliza Katibu Mkuu wa Wizara ya Mawasiliano na Teknolojia ya Habari Dkt. Zainab Chaula wakati akifungua kikao hicho kilichofanyika katika ukumbi wa mikutano wa Wizara hiyo.

WIZARA YAWAKUTANISHA WADAU KUJADILI MAPENDEKEZO YA KUTUNGWA KWA SHERIA YA TEHAMA



Katibu Mkuu wa Wizara ya Mawasiliano na Teknolojia ya Habari, Dkt Zainab Chaula akizungumza wakati akifunga kikao cha wadau cha kujadili mapendelekezo ya kutungwa kwa Sheria ya TEHAMA kilichofanyika katika Ukumbi wa Jakaya Kikwete Jijini Dodoma. Kulia ni Mkurugenzi wa Kitengo cha Sheria Lugano Rwtaka na Kushoto ni Kaimu Mkurugenzi wa Sera na Mipango Godleader Shoo.

Na Faraja Mpina, WMTH

Wizara ya Mawasiliano na Teknolojia ya Habari imewakutanisha wadau mbalimbali ambao ni wataalamu wa TEHAMA kutoka katika Wizara, taasisi za Serikali na sekta binafsi ili kujadili mapendelekezo ya kutungwa kwa Sheria ya TEHAMA kwa len-

go la kupata maoni ya wadau hao na kuyafanya kazi kabla ya kupeleka mapendelekezo hayo katika Sekretarieti ya Baraza la Mawaziri. Akifungua kikao hicho kilichofanyika tarehe 16.03.2021 katika Ukumbi wa Jakaya Kikwete,

Jijini Dodoma, Katibu Mkuu wa Wizara hiyo Dkt. Zainab Chaula amesema kuwa kuna uhitaji mkubwa wa kuwepo kwa Sheria ya TEHAMA nchini kutokana na kukua kwa kasi kwa teknolojia hiyo nchini yenye msukumo mkubwa kibashara.

Amesema kuwa Serikali imewekeza katika kukuza matumizi ya TEHAMA nchini ili kuendana na mahitaji ya mapinduzi ya nne ya viwanda, hivyo ni muhimu kuwa na Sheria itakayohakikisha inatoa mwongozo wa matumizi sahihi ya mifumo ya TEHAMA na wananchi waweze kushiriki ipasavyo kwenye uchumi wa kidijitali.

“Ili mambo yaende vizuri ni lazima tuwe na Sheria mahsus ya TEHAMA itakayotoa mwongozo na kusaidia kusimamia na kutambua nani anafanya nini, wapi, muda gani na kwa utaratibu upi”, alizungumza Dkt. Chaula.

Ameongeza kuwa Sheria hiyo itaweka utaratibu wa mifumo rafiki na madhubuti katika uendelezaji na usimamizi wa matumizi ya TEHAMA nchini ikiwa ni pamoja na kuimari-sha mifumo ya taasisi za umma kwa maendeleo ya Taifa.

“Kupitia Sheria hii natamani tutoke na dawa ya kumfanya kila mtu awe mtiifu na mzalendo badala ya

kuwatafuta wahalifu wa mitandaoni tutengeneze elimu jamii itakayowafanya watu wawe na matumizi sahihi badala ya kutumia mifumo ya TEHAMA badala ya kuitumia kuchafua taswira ya nchi na kudhalilisha wengine”, alizungumza Dkt. Chaula.

Aidha, Dkt Chaula ametoa rai kwa wadau hao kupeleka mrejesho kwa taasisi wanazoziwakilisha na kama kuna kitu ambacho kimesahaulika kitumwe katika Wizara hiyo kwa maandishi ili kuondoa sintofahamu ya wadau mbalimbali kuja kusema hawakushirikishwa.

Dkt. Chaula ameongeza kuwa mchakato wa kutungwa kwa Sheria hiyo ni wa muda mrefu na tayari maoni ya watu wengi katika mae-neo tofauti tofauti yamekusanywa na kufanyiwa kazi.

Naye Mkurugenzi wa Kitengo cha Sheria wa Wizara hiyo Lugano Rwtaka amesema kuwa Sheria ya TEHAMA ni jambo la msingi kwa sababu soko la TEHAMA linakuwa kwa kasi nchini na duniani pote na kuleta uhitaji wa kuwa na matumizi ya TEHAMA kwa mujibu wa Sheria.

Amesema kuwa kuna sheria mbalimbali zinazosaidia kukuza na kuleta ulinzi katika TEHAMA lakin ni bado kuna vitu vingi ambavyo havijaainishwa katika sheria hizo

hivyo kuna umuhimu wa kuwa na Sheria maalumu ya kusimamia TEHAMA nchini ambayo itaenda kubuni mbinu mbalimbali za kuimarisha ulinzi katika mtandao.

"Moja ya malengo ya Sheria hii ni kuhakikisha bidhaa za TEHAMA zinatengenezwa hapa hapa nchini kwa matumizi ya nchi lakini hata pia tuweze kuziua katika nchi

nyingine za nje ya Tanzania", Alizungumza Rwetaka.

Naye Dkt. Nkundwe Mwasaga Mhadhiri kutoka Taasisi ya Teknolojia ya Dar es Salaam (DIT) amesema kuwa kuna umuhimu wa kuwa na Sheria ya TEHAMA ambayo itatengeneza mazingira ya kuweza kufanya tafiti, ubunifu na uwekezaji katika TEHAMA.



Mkurugenzi wa Kitengo cha Sheria wa Wizara ya Mawasiliano na Teknolojia ya Habari Lugano Rwetaka akizungumza katika kikao cha wadau cha kujadili mapendekezo ya kutungwa kwa Sheria ya TEHAMA kilichofanyika katika Ukumbi wa Jakaya Kikwete Jijini Dodoma. Katikati ni Katibu Mkuu wa Wizara hiyo Dkt. Zainab Chaula na Kushoto ni Kaimu Mkurugenzi wa Sera na Mpango wa Wizara hiyo Godleader Shoo.



Baadhi ya wadau walioshiriki katika kikao cha wadau cha kujadili mapendekezo ya kutungwa kwa Sheria ya TEHAMA kilichofanyika katika Ukumbi wa Jakaya Kikwete Jijini Dodoma.

WAZIRI NDUGULILE ATEMBELEA VITUO VYA TEHAMA ZANZIBAR, TAASISI ZA MAWASILIANO KUSHIRIKIANA KUTOA HUDUMA.

Na Faraja Mpina, WMTH

Waziri wa Mawasiliano na Teknolojia ya Habari Mhe. Dkt. Faustine Ndugulile amefanya ziara ya kutembelea vituo vya TEHAMA Kisiwani Pemba vilivyopo Wete, machomane, Micheweni na Chonza ambavyo ni miongoni mwa vituo kumi vilivyo-jengwa na Mfuko wa Mawasiliano kwa Wote (UCSAF) kwa gharama ya shilingi 1,138,000,000 visiwani Zanzibar kwa ajili ya kutoa huduma za TEHAMA kwa wananchi.

Dkt. Ndugulile amesema kuwa katika Wizara yake kuna maeneo am-bayo ni ya kimuungano hivyo, ziara yake ni kwa ajili ya kutembelea na kufahamu shughuli mbalimbali zinazoendelea kufanyika ambazo ni za muungano na mojawapo ni vituo hivyo vilivyojengwa na UCSAF, vinne kisiwani pemba na sita kisi-wani Unguja ambapo jumla ni vituo kumi.

“Tumeviona vituo vya TEHAMA, vina kompyuta lakini havifanyi

kazi, niziombe taasisi zangu ziwe zinazungumza katika juhudi zetu tunazozifanya kwasababu tuna uwezo wa kushirikiana kufanya kwa pamoja katika baadhi ya maeneo, sio mfano UCSAF anajenga jengo na kuweka vifaa halafu halina intaneti wakati Shirika la Mawasili-no Tanzania (TTCL) lipo lingeweza kuhakikisha intaneti inapatikana”, Dkt. Ndugulile.

Aidha, amezisisitiza taasisi za mawasiliano kuangalia huduma zinazoweza kuwekwa katika vituo hivyo ili viweze kutoa huduma ya pamoja na kusaidia uendeshaji wa vituo hivyo kuliko kuiachia mzigo Serikali ya Mapinduzi ya Zanzibar kuviedhesha kwa kulipia gharama mbalimbali za uendeshaji.

“Tukiweza kufanya vizuri katika vituo vya TEHAMA vilivyopo, vitatupa nguvu zaidi ya kupanua wigo wa vituo kama hivi katika maeneo mengine,



Waziri wa Mawasiliano na Teknolojia ya Habari wa Serikali ya Jamhuri ya Muungano wa Tanzania, Dkt. Faustine Ndugulile (kwa tatu kushoto) akizungumza katika kituo cha TEHAMA cha Wete kisiwani Pemba. Kutoka kushoto ni Katibu Mkuu wa Wizara ya Ujenzi, Mawasiliano na Uchukuzi Amour Bakari, akifuatiwa na Mkurugenzi wa Mawasiliano wa Wizara hiyo Dkt. Mzee Mndewa na Kulia ni Waziri Kindamba Mtendaji Mkuu wa Shirika la Mawasiliano Tanzania.

ili huduma za TEHAMA ambayo ni haki ya msingi ya kila mwananchi ipatikane kwa wigo mpana zaidi visiwani hapa”, Dkt. Ndugulile.

Hata hivyo, Katibu Mkuu wa Wizara ya Ujenzi, Mawasiliano na Uchukuzi Amour Bakari amesema kuwa kutakuwa na mpango wa dharura wa kuhakikisha vituo hivyo vinaanza kufanya kazi ndani ya muda wa wiki moja na baadae kutakuwa na mpango endelevu kwa kuhakikisha vituo hivyo vinaendelea kutumika.

Aliongeza kuwa wamefanya mazungumzo na TTCL ikiwa ni pamoja na taratibu za kufanya malipo ili kuhakikisha Shirika hilo linafikisha huduma ya intaneti katika vituo hivyo ili wananchi waanze kuvitumia.

Naye Katibu Mkuu wa Wizara ya Mawasiliano na Teknolojia ya Habari wa Serikali ya Jamhuri ya Muungano wa Tanzania amesema kuwa Wizara hiyo ni ya muungano na wamekuja katika vikao wa mashirikiano baina ya Wizara hizo



Waziri wa Mawasiliano na Teknolojia ya Habari wa Serikali ya Jamhuri ya Muungano wa Tanzania, Dkt. Faustine Ndugulile (kwa kwanza kushoto) akimsikilia Mkurugenzi wa Mawasiliano wa Wizara ya Ujenzi, Mawasiliano na Uchukuzi (SMZ) Dkt. Mzee Mndewa (aliyevaa tai) walipotembelea kituo cha TEHAMA cha Mwera kilichopo Unguja.

hizo mbili ili kuangalia mafanikio na changamoto ili kuweza kuzitua kwa pamoja.

“Katika ziara hii nimekuja na wataendaji wa Wizara na wa taasisi zetu zote za mawasiliano ili kutembea pamoja kwa kila mmoja kujifunza kwa mwenzake na kutoka na mpango mkakati wa kuhakikisha tunatatua changamoto zilizopo na kuzidi kuuimarisha muungano wetu”, Dkt. Chaula.

Naye Mkuu wa Wilaya ya Mkoani kisiwani Pemba amesema kuwa amefarijika kuona Waziri huyo wa

Serikali ya Muungano ametembelea vituo hivyo na kudhihirisha Tanzania Bara na Visiwani ni wamoja na yanayofanyika ambayo yanahusiana na sekta za muungano yanatekelezeka katika pande zote mbili.


“Ziara hii inadhihirisha tuna muungano imara na upo vizuri kufuatilia yale ambayo ni ya pamoja ili kuweza kuhakikisha mapungufu yanafanyiwa kazi kwa kushirikiana na kuyaweka vizuri, ndio maana ujio huu umetaja mpaka muda ambao vituo hivi vitaanza kufanya kazi”, alisema.

**Maisha
ni
TEHAMA!**



@wizaramth

TUTAKUKUMBUKA DAIMA



UPUMZIKE KWA AMANI



**Limeandaliwa na Kitengo cha Mawasiliano Serikalini
Wizara ya Mawasiliano na Teknolojia ya Habari
S.L.P. 677,40470 Dodoma, Tanzania
Barua pepe: ps@mawasiliano.go.tz
Tovuti: www.mawasiliano.go.tz
Instagram: Wizaramth**